

## I. DISPOSICIÓN XERAIS

### XEFATURA DO ESTADO

**7327** *Real decreto lei 7/2010, do 7 de maio, polo que se crea o Fondo de Apoio á República Helénica e se autoriza un crédito extraordinario por importe de 9.794.387.450 euros para a súa dotación.*

A crise financeira que estalou a mediados de 2008 puxo de manifesto o elevado grao de interrelación existente entre as economías dos distintos países. Así, inicialmente a través dos mercados financeiros e despois a través dos fluxos comerciais, adquiriu un carácter global que Europa non puido eludir. Aínda que no caso concreto da área do euro a moeda común foi un elemento clave para illar en boa medida os Estados membros das flutuacións cambiarias, a crise está a ter efectos especialmente adversos en Grecia.

A percepción dun incremento do risco de falta de pagamento soberano nun Estado membro da zona do euro podería ter repercusións sistémicas no resto de Estados membros, principalmente a través dos mercados de bonos e do sector financeiro, resultando, ademais, afectada a credibilidade do euro.

Co fin de evitar os riscos para a estabilidade financeira da zona do euro, os Estados membros da zona do euro acordaron no Consello Europeo do 25 de marzo de 2010 contribuír cando for necesario, no marco dun paquete de axuda que incluíse financiamento do Fondo Monetario Internacional (FMI) e europeo, a través de préstamos bilaterais centralizados pola Comisión.

O 23 de abril de 2010 a República Helénica formulou a súa solicitude de axuda, circunstancia que, co acordo unánime do Eurogrupo, determinou a activación do mecanismo de apoio, consistente nunha provisión de financiamento, a través de préstamos bilaterais mancomunados centralizados pola Comisión Europea, durante tres anos desde a sinatura do correspondente Acordo con Grecia. Estes préstamos outorgáranse baixo fortes elementos de condicionalidade negociados polo FMI, a Comisión Europea, o Banco Central Europeo (BCE) e o Goberno grego e a tipos de xuro non concesionais.

Segundo o acordado polo Eurogrupo, o importe total do paquete financeiro ascenderá a 110.000 millóns de euros en tres anos, dos cales 80.000 serán achegados polos Estados membros da zona do euro –30.000 durante o ano 2010– e os 30.000 millóns restantes polo FMI.

A contribución total de España a este programa de axuda, calculada sobre a clave de participación de España no capital desembolsado do Banco Central Europeo (BCE), axustada aos Estados da zona do euro, excluída Grecia, ascenderá a 9.794.387.450 euros, dos cales no ano 2010 se deberán desembolsar 3.672.895.290 euros. Os desembolsos comezarán a producirse unha vez que sexan asinados os acordos correspondentes entre os representantes dos Estados membros da zona do euro e a República Helénica, e o Consello de Ministros deberá previamente ter autorizado a súa sinatura e aplicación provisional por parte de España.

Para instrumentar a dita achega, que se materializará no outorgamento dun préstamo, considérase que o instrumento orzamentario máis adecuado é a creación dun fondo sen personalidade xurídica dos previstos na Lei 47/2003, do 26 de novembro, xeral orzamentaria. A dotación deste fondo, dada a inexistencia de crédito nos orzamentos xerais do Estado para esta finalidade, require, pola súa vez, a autorización do correspondente crédito extraordinario por importe de 9.794.387.450 euros.

Co fin de axudar a superar situacións de desfasamento de tesouraría e ata o momento en que estea operativo o mecanismo conxunto de axuda a Grecia, poderanse anticipar recursos á República Helénica a través dun préstamo a curto prazo con cargo a este fondo, nos termos que conveñan ao prestamista e ao prestameiro.

A situación crítica en que se atopa a República Helénica e a súa urxente necesidade de liquidez xustifican que non se poida demorar a articulación dos instrumentos e trámites que exige a formalización do préstamo e o seu desembolso inmediato. Estas constitúen, polo tanto, as razóns de extraordinaria e urxente necesidade que motivan a autorización do crédito extraordinario mediante real decreto lei.

Na súa virtude, facendo uso da autorización contida no artigo 86 da Constitución española, por proposta da vicepresidenta segunda do Goberno e ministra de Economía e Facenda, e logo de deliberación do Consello de Ministros na súa reunión do día 7 de maio de 2010,

#### DISPOÑO:

##### Artigo 1. *Constitución do Fondo de Apoio á República Helénica.*

1. Créase o Fondo de Apoio á República Helénica, por importe de 9.794.387.450 euros, adscrito ao Ministerio de Economía e Facenda, a través da Secretaría de Estado de Economía, como instrumento para xestionar o préstamo que concederá o Reino de España á República Helénica no marco do compromiso asumido polos xefes de Estado e de Goberno da zona do euro o 25 de marzo de 2010.

Ata o momento en que estea operativo o compromiso de axuda conxunta sinalado no parágrafo anterior, poderase realizar, con cargo a este Fondo, unha operación activa de préstamo a curto prazo nos termos e condicións que conveñan o prestamista e o prestameiro, co fin de axudar a superar as dificultades transitorias de tesouraría da República Helénica.

2. O réxime orzamentario, económico-financeiro, contable e de control deste fondo será o previsto na Lei 47/2003, do 26 de novembro, xeral orzamentaria, para os fondos carentes de personalidade xurídica mencionados no artigo 2.2 da dita lei.

##### Artigo 2. *Dotación do Fondo de Apoio á República Helénica e autorización do crédito extraordinario.*

1. O Fondo para o Apoio á República Helénica dotarase, con cargo ao orzamento do Estado, por un importe de 9.794.387.450 euros.

2. Para os efectos indicados no punto anterior, autorízase un crédito extraordinario no orzamento da sección 15 «Ministerio de Economía e Facenda», servizo 16 «Secretaría de Estado de Economía», programa 931.M «Previsión e política económica», capítulo 8 «Activos financeiros», artigo 87 «Achegas patrimoniais», concepto 872 «Achega patrimonial ao Fondo de Apoio á República Helénica», por importe de 9.794.387.450 euros.

3. O crédito extraordinario que se autoriza no punto anterior financiarase con débeda pública.

4. Os rendementos do préstamo que se conceda e as devolucións do principal integraranse nas dotacións do Fondo e procederase ao seu ingreso no Tesouro Público segundo se vaian producindo.

##### Artigo 3. *Xestión do Fondo de Apoio á República Helénica.*

1. A xestión do Fondo será realizada pola Secretaría de Estado de Economía a través dunha conta aberta para o efecto no Banco de España cuxo saldo conformará posición coa conta xeral do Tesouro. A dotación transferirase á dita conta segundo as necesidades de financiamento do Fondo.

2. Os libramentos con cargo ao Fondo serán acordados polo titular da Secretaría de Estado de Economía en cumprimento das estipulacións pactadas nos acordos subscritos.

3. Os rendementos do préstamo que se conceda e as devolucións do principal ingresaranse na conta do Fondo e posteriormente transferiranse á conta xeral do Tesouro.

Artigo 4. *Control da Intervención Xeral da Administración do Estado.*

A Intervención Xeral da Administración do Estado controlará o Fondo de Apoio á República Helénica a través da auditoría pública, nos termos previstos na Lei 47/2003, do 26 de novembro, xeral orzamentaria.

Artigo 5. *Control parlamentario.*

O Ministerio de Economía e Facenda remitirá á Comisión de Economía e Facenda do Congreso dos Deputados un informe anual sobre a actividade do Fondo de Apoio á República Helénica.

Disposición adicional única. *Réxime fiscal.*

O Fondo de Apoio á República Helénica terá, para os efectos fiscais, o mesmo tratamento que o Estado.

Disposición derradeira primeira. *Habilitación para o desenvolvemento e aplicación.*

Habílitase o titular do Ministerio de Economía e Facenda para ditar as disposicións que sexan necesarias para a aplicación e o desenvolvemento do previsto neste real decreto lei.

Disposición derradeira segunda. *Vixencia do Fondo de Apoio á República Helénica.*

O Fondo de Apoio á República Helénica non se extinguirá mentres resulte pendente de cumprimento calquera obrigaición económica derivada do préstamo concedido.

Disposición derradeira terceira. *Entrada en vigor.*

Este real decreto lei entrará en vigor o mesmo día da súa publicación no «Boletín Oficial del Estado».

Dado en Madrid o 7 de maio de 2010.

JUAN CARLOS R.

O presidente do Goberno,  
JOSÉ LUIS RODRÍGUEZ ZAPATERO